

rus uterque Politicus & Ecclesiasticus viget: jus dicitur omnibus eò ex insulis confluentibus, statutis temporibus, ad Kalendas nempe Novembres, aut eo circiter. Sub Prætoris Capitali quatuor *Kircwæ* prætores inferiores (Bailivos vulgo vocant) suffragiis Prætoris Capitalis (qui & *Kircwæ* Consul est) & membrorum Senatus politici, quotannis creantur; minoribus causis audiendis intersunt, quando ipse Prætor capitalis, insulas omnes, querelis audiendis, & jure dicendo, obit. Personas maleficas, delatas, & comprehensas, sua ipsarum confessione, aut judiciis certissimis & testimoniis irrefragabilibus, Ministrorum Ecclesiasticorum præeunte & examine & approbatione, convictas & damnatas, Vulcano dicant.

Pastores Verbi Dei singulis mensibus, tempore æstivo (hyemali enim sævissimo mari committere se non audent) *Kircwæ* conveniunt, eademque in rebus ecclesiasticis pertractandis ratione, qua in ipsa Scotia (ex qua magna ex parte sunt oriundi) procedunt.

Ministri numero sunt septemdecem in universum; tres, qui in Australibus; octo, qui in Pomonâ; & sex qui in borealibus insulis, ecclesiarum, rerumque eo spectantium, curam

gerunt, disciplinamque ecclesiasticam in delinquentes magna cum diligentia & severitate exercent.

Religionis Reformatæ omnes hodie sunt.

Qui Orcadas primi tenuerint, satis non constat. Omnes Germanicæ originis eos fuisse contendunt; at è qua natione Germanorum advenerint, id non proditur. Si ex sermone conjecturam facere liceat, ex Norvegia vel Dania oriundos poterit quis existimare: olim namque, & hodie quoque, in multis, non in omnibus Orcadum insulis, vetere Gothica seu Norvegorum lingua, sed multum corrupta utuntur; eademque res ponderandi ratio cum Norvegis, est illis communis. Hodie vero Scotorum (quorum magnus apud eos numerus vivit, præcipuo in Ecclesia, & Politia munere fungens) vernacula, ut & ipsorum Gothica, juxta est quibusdam ex eis in usu. Sunt qui Pictos eos fuisse arbitrantur, hoc maxime argumento, quod fretum eos à Cathanesia dividens Picticum cognominatur: & præterea, quod in diversis Orcadum locis, domunculæ quædam subterraneæ (quas Pictorum fuisse Indigenis etiamnum hodie est persuasum,) inveniantur. De re vero incerta nil certi affirmandum.

Veteris Incolæ.

A L I A

O R C A D V M

D E S C R I P T I O.



Scotia Septentrionalis vicinas continenti suo habet Insulas *Orcades*, ad latus Boreale; ad Occidentale, Hebridas; & altius versus Septentrionem Scetlandiam. Sunt autem *Orcades* Insulæ, ab hominibus cultæ, xxvi i i, præter alias complures habitatoribus vacuas, quæ pascendo solummodo pecori inserviunt. Vulgo *Orkney* appellantur, modicis inter se discretæ spatiis. Eas ita appellat antiqua membrana, quasi *Argath*, id est, supra *Getas*, Camdenus mavult supra *Cath*, objacet enim *Cath* regioni Scotiæ, quam ob promontorium *Cathness* nunc vocant, cujus incolæ *Carini* pro *Cathini* perperam Ptolemæo nominari videntur. Solini ætate hominibus vacarunt, & junceis herbis inhorruerunt, nunc vero cultæ sunt. Pars sunt Imperii Scotici. Olim tamen suis paruerunt Regibus. Trium meminerunt annales Scotiæ, quorum primus *Gæus* fuit (uti qui-

Scotia.

dam opinantur) in triumphum abductus cum uxore & liberis à Claudio Cæsare, cujus mentio fit apud Tranquillum, Bedam & Eutropium. Secundus *Belus* sibi manus intulit, victus prælio ab Eveno Scotiæ Regæ. Tertius *Gethus* fuit, frater Gethi Regis Pictorum, qui ex Albione fugiens hic Rex creatus est. Incertum qui primi has insulas tenuerint, an Picti, an Saxones, an Dani & Norvegi, quod maxime verisimile, quia & lingua, & moribus, & locorum appellationibus Danis maxime similes sunt, quibus tamen Scotia suos idiotismos & mores permiscuit. Regio omnis sylvis caret, hordei tamen & avenæ feracissima. Serpens in eis nullus aut venenosus animal, quo etiam Hibernia caret. Animalium greges numerosissimos nutriunt. Lepores, cuniculi, grues & cygni hic multi. Copiosa item hic piscatio est, ex qua incolæ quantum uberrimum referunt. Iulius Agricola classe primus Britanniam circumvectus, Orcadas ad id tempus incognitas, invenit, domuitque; tantum abest,

Soli indoles.

Animalium varietas.

Orcades.

Prisci Reges.